

1 PETRO

Petro Ovoli Ɔtonyade

¹ Ovoli kīi to yī, Petro, Yesu Kristo foto ɔnyane sekē. Ntsele ye mamena bati a kī Baguma pau, kī begba biko nde banɔvɔē aye ne Ponto, Galatia, Kapadokia, Asia mo Bitinia amantam kame a.

² Baguma boe Ɔlega pau mi nde ayekī ehihie eyi a, ade ye Hūhū a kpale mi akū kī míakoa obu mikpa Yesu Kristo, lɔkoa ekoa ye baboane evole mi akū.

Baguma emo mi konya, eƆ lukudo lepo ne mi kame daa.

Letsa a Kī Budzi Bɔadā Anɛ Kakpa Daa a.

³ Mifō bumu Baguma, boe Ɔlate Yesu Kristo Ɔlega a! Ne ye konyakamo beblebee a sū ekpa boe nkpā vɔē etsāmena Yesu Kristo kadzela katomena kanokpa kame. Fukī fō budeī konete a kī kɔkpola.

⁴ Letsa a kī boe ane teī kī boe awe aata nye adzapadie mo koya a kī Baguma mane eyi ekpa ye bati ne ode, awā kī yaávō, yaábu kade ade yaátse leme a.

⁵ Mi a kī mite Kristo mido, kī bekoa Baguma kɔbē bemanɛ mi, kī Baguma aakpa mi nkpā ne luwi nkaɛ akū a, ade mi lá adzapadie kī a.

⁶ Mimo kawole ne foletsa kīi akū, tito kī ne loko lukū kame malo, míamo lubo ne sohue aholo aholo pii kame,

⁷ ayekī baadā nte mi katekado a sipi. Sika ngbā kī sapuli kawo malo, baso se kadā ne fi kame.

Ade aye kenε kī beso mi katekado a kī ketε koyā keba sika a bedā ayekī kena daa, lokoā baamu mi, bekpa mi kukūkpale mo obu ne Luwi a kī Yesu Kristo aaya a akū.

⁸ Tito kī mitámō ye malo a, miawε ye kale, ade kī miámō ye finyaa malo a, mite ye mido, ade miamō kawole wī kadi kī oti leláapuli εle.

⁹ Ayekī mite Kristo mido a sū, Baguma kpa mi tekla nkpā.

¹⁰ Ade nkpā kī akū Baguma onukpē banyεne a dzi bekona, bewε foletsā kame yededeede, ade bele biyi ayekī Baguma aamō mi kōnya, ekpa mi nkpā a.

¹¹ Beboā mbodi bewε loko a kī fōaya mo ayekī fōaya ne foe kame a. Ade fukī nyε loko a kī Kristo Hūhū ne be kame a katsa ayekī Kristo aamō lubo, mo kukūkpale a kī kóatomō koe a.

¹² Baguma nyε etsa onukpē banyεne a kī nné be kale sū bekena adzuma, mbom ne mi kale sū. Bele kodzela ne foletsā a kī finyaa foto banyane a tsā Hūhū Kpalēwa kobē a kī Baguma do etomēna ode a akū, bide letsā ne Kalē Wī a akū. Ade fukī nyε fotsa a kī Baguma ode foto banyane malo wε kī banu kayo kufe a.

Baguma Vε Boe Kī Bōyadzi Nkpā Wī.

¹³ Ne foesū mina ne kukūmanε kame mikpa adzuma kakena, mipi mi akū kapi wī. Mikōa anε flee mite ne nhila a kī Baguma aakpa mi ne luwi a kī Kristo aaya a akū.

¹⁴ Nde babi kī babu Baguma ni, mitafō sukēna fowetsa kpa a kī fōna ne mi kame ne kadikatanyi kame kōkōε a lenya mi akū.

15 Nde ayekĩ Baguma a kĩ evē mi a nye oti kpalewa a, ade aye kenē kĩ mi malo mianya bati kpalewa nē mi fotsakelawa fudi nye fudi kame a.

16 Kitonekĩ Baguma le nē Katselē Kpalewa a le kĩ, “Minya bati kpalewa, kitonekĩ oti kpalewa manē.”

17 Nte miave Baguma a kĩ yaádã oti anē ade yadzemō odi nye odi nē ye lēkenana onukpē a kĩ boe Ọlęga nē mi mpae kame ni, kenē kĩ miavila ye nē mi fuwi nkaē kame nē tite kĩ akũ.

18 Kitonekĩ minyina kĩ nné sika ngbã ãye sika owoe a kĩ savõ Baguma kōa ese koto nē mi lolō, enye mi nē nkpã pupulidza kadzi a kĩ mi bawanyō kōa biyi mi a kame,

19 mbom Kristo babōanē mō kōya paa a ekōa ete mi. Kristo la nde kavelibi kĩ kekpolā ade mfumsu lemē lelāa ke akũ a.

20 Baguma pau ye eyi fōmō ebōa katinya, ade enye ye etsa nē fuwi nkaē kĩ kame nē mi sũ.

21 Mitsã Kristo akũ mite Baguma a kĩ edzela ye etomena kanokpa, edo ye obu lemē a mido. Nē foesũ mi katekado mō kōnete deĩ nē Baguma kame.

22 Finyaa kĩ mite onokōali kalē a, mitsã ke kame mikpalē mi akũ, ade miawē mi bawāē Kristofō kalē nē onokōali kame a, kenē kĩ miakōa mi towōlē flee miwē akũ kalē papaapa.

23 Baguma kalē a kĩ kideĩ nkpã, kĩ kelá kawũna a akũ fōtsã mō Baguma kpa mi nkpã vōē, mikena nde oti a kĩ yaáku a babi. Lemē nné ekĩ yaku a babi miane.

24 Nde ayekĩ Katselē Kpalewa a le kĩ,
“Batidziwa flee la nde tuwĩ aye

ade be kahēhe flee la nde nhuile a.
 Tuwĩ ave ade te nhuile a awili.

²⁵ Leme boe ɔlate kale a kɔ̃ waa daa.”
 Ade kale kĩ nyē Kale Wĩ a kĩ ke akũ bide letsã
 bekpa mi a.

2

Kristo Nyé Kɔla Okonto De a.

¹ Ne foesũ mifɔ̃ tokpa tidi nyē tidi odu kakena.
 Mifɔ̃ fɔvã kama mɔ ane kame keke fɔtsa kakena,
 mɔ anengbã mɔ bati buĩ kanye.

² Miwe Baguma ɔnokɔali kale a nde ayekĩ
 akɔkɔa awe teme mui luwi daa, ayekĩ míabo ane
 ne mi nkpã kate kame.

³ Katsēle Kpalēwa a le kĩ, “Mi mɔawe mita
 onukpẽ midã, mimo ayekĩ boe ɔlate a deĩ seme
 kale.”

⁴ Ne foesũ mifuã miya ne boe ɔlate a sekẽ. Ade
 ye nyē nkpã kɔla kake de a kĩ bati sĩ kĩ lenyē fɔtsa
 pupulidza, leme ade de Baguma nyē kĩ letē kɔya
 ne ye ane a.

⁵ Mi malo mila nde kɔla kake nkpã boe, foesũ
 miya Baguma ekɔa mi eke hũhũ kame afɔlie kɔla.
 Ade kɔla kĩ kame míasum nde basɔfɔ kpalēwa
 kĩ bebɔa hũhũ kame afɔlie kĩ yawo Baguma ane
 betsãmēna Yesu Kristo akũ bekpa Baguma.

⁶ Kitonekĩ Katsēle Kpalēwa a le kĩ,
 “Midã! Ìnye kɔla akũ de titiliwu a,
 nkɔa de mayi ne Zion.
 Odi nyē odi kĩ ete ye edo ni,
 kɔnyɔã leláawo ye da.”

⁷ Foesũ mi a kĩ mite mido a ni, de kĩ te kɔya paa
 lekpa mi, leme bikĩ betáte bido a kɔ̃ ni, binyi kĩ,

“De a kī kola bakene sī a,
ade de leyadani okonto akū de
kī lisī leba flee a.”

⁸ Katsēle Kpalēwa a foletsa bebā leme le kī,
“Ade de a kī laafō bati litula a,
de kpale kī laafō bati lenē beto.”

Bitula beto kitonekī betáte ye kale a bido.
Baguma awe lihihie foe lomo eyi ekpa be.

⁹ Leme mi kō kade a kī Baguma pau, legākanya
basofo, omaī kpalewa, mo bati kī Baguma kōa
ekena ye bade miane. Baguma ve mi etomena
otū kame eyamena ne ye awāwā ohaī a kame, kī
mide letsā ne ye awāwā fotsa a akū.

¹⁰ Ne loko lidi kī letē kame ni, mitánya Baguma
omaī, leme finyaa minye ye omaī. Ne kōko loko
lidi kame ni, Baguma támō mi konya, leme finyaa
emo mi konya.

Midzi Nkpā Nde Baguma Basate Aye.

¹¹ Nwaē ame bawene, nde banovoē mo ba-
sitsāne ne katinya kīī kame ni, mitakena ne
sukena fowetsa kpa a kī foako odo kayidza kadza
ne mi akū a.

¹² Miboa obla wī ne amamufo a kame, ayekī nte
bele kodzela ne mi akū kī tokpa bakenane miane
malo ni, ke liti, baamo adzuma wī a kī mikena,
lokōa baamu Baguma ne ye kaya Luwi a akū.

¹³ Ne boe Olate sū ni, midola mi akū mikpa
batidziwa a kī bidzina ne mbla onukpē. Midola
mi akū mikpa Legānokōē Flefle a kī lideī otumi
lebē flee a.

¹⁴ Midola akū lomo leme mikpa abāā banokoē a
kī Legānokōē a ado kī beyaavele tokpa bakenane
a soto, bimu bati a kī bakena tuwī a leme.

15 Kitonekĩ Baguma kawε nye kĩ mikoa tuwĩ kakena midina fokoasiatsa a kĩ bati ale ne mi akũ ne kadikatanyi kame a.

16 Midzi nkpā nde bati kĩ bidzi be akũ akũ aye, leme mitakoa akũ akũ kadzi a mikena nde tokpa kakena osi kana, mbom midzi nkpā nde Baguma basate aye.

17 Mikoa obu mikpa odi nye odi. Miwe mi bawaẽ bate badone kale. Mivila Baguma. Mikoa obu mikpa Legānokōẽ Flefle a leme.

Kristo Lubokamɔ a Nye Nfantuhũ Fokpa Mi.

18 Mi basumune, midola mi akũ mikpa mi balate, mikoa obu flee mikpa be. Nné mi balate a kĩ bedo, bideĩ seme kale a odi kene kĩ miakpa obu, mbom mibu bikĩ bideĩ seme onye a leme.

19 Nte odi lamɔ lubo a kĩ letáfeta kĩ emɔ kamɔ, leme ne Baguma sũ edo owole emɔ lubo ni, Baguma aahila ye.

20 Nte mikena fotsa kpa mɔ mido owole mite soto kavele a ni, kamu kawodabe deĩ ne foe kame? Leme nte mikena tuwĩ mɔ mido owole mimó lubo ne foe kame ni, Baguma aahila mi.

21 Ade fukĩ sũ Baguma ve mi a, kitonekĩ Kristo mɔawe a malo mó lubo ne mi lolɔ, ekɔa foe etsa mi nfantuhũ kĩ míatsã ye abɔa kakekõ.

22 “Etákena tokpa tidima,
ade etáke odima leme a.”

23 Kĩ bivũna ye a, etávũna odima ese koto. Kĩ bemona ye lubo a, etáhũnahũna odima, mbom ekɔa ane ete ne Baguma a kĩ yadze foletsɔ ne osi kpĩ akũ a akũ.

24 Kristo mɔawe lelɔ boe tokpa ne ye sukena kame enamena asendua a akũ, ayekĩ bóane ne

tɔkpa kɔbɛ kayɔ, budzi nkpā bɔkena tuwī. Ekɔa fɔɔkpa a kī ɛte a ɛtsa mi fɔso.

²⁵ Kɔkɔɛ a, mina ndɛ baveli kī bɛyɛla osi, lɛmɛ finyaa Baguma muniki mi miya nɛ mi Baveli Ɔkpānɛ kī enyɛ mi Akū Ɔdāmenanɛ sekɛ.

3

Batsɔ Mɔ Banyɔ Akū Kɔdɛ.

¹ Ade ayea mi batsɔ midɔla mi akū mikpa mi banyɔ, ayekī nte be kamɛ badi tâte Baguma kale a bido malo ni, mi ɔbla wī aafɔ bɛte bido. Ade foláasī malo kī miabinya onukpɛ mile kadima,

² kitonɛkī baamɔ ayekī mi ɔbla kabɔa nɛ Baguma kavila kamɛ kpale mi akū.

³ Mi kalekadā ketana nɛ sukɛna kalɔla ndɛ tɔlɔ kasui, sika ngbā fɔtsa kado, mɔ tilima kī tɛte kɔya kadzi kamɛ.

⁴ Mbom mi kalekadā a kɛna nɛ hūhū kī ɛdɔ, yadā dīi kamɛ, ade enya letsa a kī leláawɔ lɛmɛ a. Tiyitsɔ kīi odu tɛ kɔya paa nɛ Baguma anɛ.

⁵ Nɛ kɔkɔɛ a, batsɔle kpalewa a kī bɛkɔa anɛ bite nɛ Baguma akū a, dɔla be akū bɛkpa be banyɔ, ade fɔnya akū kakɛɛɛ fɔkpa be a.

⁶ Ade aye Sara dɔla ye akū ɛkpa Abraham a, ade ɛvɛ ye kī, “Yī Ɔlate” a. Finyaa mi malo midani Sara babitsɔle, nte miakɛna tuwī mɔ miávila letsama.

⁷ Ade aye mi banyɔ lɛmɛ midzi mɔ mi batsɔ nɛ akū kayɔkanu kamɛ, kitonɛkī mi batsɔ lelá kɔbɛ ndɛ mi aye. Mikpa be obu kitonɛkī mimɔ be flee Baguma mó kɔnya kī miádzi nkpā kī elá kawūna. Nte miakɛna foe lomɔ ni, letsama lelásua mi mpaɛbɔ osi.

Lubokamɔ Ne Tuwĩ Kakena Sũ.

⁸ Ne kawũna kame a ni, mi flee mina ne adzuni moa kame, oti akũ ekɔ mi kɔnya, miwe akũ kale, mikena seme kale midɔla akũ leme mikpa mi akũ akũ.

⁹ Mitakɔa tɔkpa mise tɔkpa kɔtɔ, ñye midumu mise kadumu kɔtɔ, mbom mivia nhila mikpa be, kitonekĩ kave Baguma ve mi kĩ miyaana nhila.

¹⁰ Nde ayekĩ Katsɛɛ Kpalɛwa le a,
 “Odi nye odi kĩ yawɛ kĩ edzi nkpã wĩ
 emɔ fuwi wĩ ni,
 tuwuli kpa tetane tito ye onukpɛ
 ade etama fɔvã leme a.

¹¹ Kene kĩ efɔ tɔkpa kakena, ekena tuwĩ,
 ebɔa mbɔdi ewe lukudɔ osi,
 etomɔ de liti mɔ ye ɔwɔle flee.

¹² Kitonekĩ boe ɔlate ane teĩ ne tuwĩ bakenane a
 akũ,
 ade ebinya ato yatse be mpaɛbo a.
 Leme boe ɔlate a abɔa kane liti kakpa tɔkpa
 bakenane.”

¹³ Nte akũ asĩ mi kĩ miakena tuwĩ ni, owei deĩ
 kĩ yaakena mi folɔewotsa?

¹⁴ Leme nte miamɔ lubo malo ne tuwĩ a kĩ
 miakena sũ ni, Baguma ahila mi! Mitavila odima,
 letsama leme letaha mi tɔwɔle.

¹⁵ Mbom mikɔa obu mikpa Kristo, boe ɔlate a
 ne mi tɔwɔle kame. Mimanɛ akũ lɔkɔ nye lɔkɔ,
 kĩ miapuli minye foe kayɔ mitsa odi nye odi kĩ
 yaavia mi folɛtsa ne kɔnɛte a kĩ mideĩ a akũ.

¹⁶ Leme mikena foe ne obu mɔ akũ kadɔla
 kame. Mifɔ mi tɔwɔle kame tekpale, ayekĩ
 nte bivũna mi malo ni, kɔnyɔã kuwo bikĩ bale

tuwuli kpa ne obla wĩ a kĩ miaboa nde Kristo batomenane a sũ.

¹⁷ Kitonekĩ nte fonye Baguma kawε ni, fonene kĩ miamo lubo nde tuwĩ bakenane, keba kĩ miamo lubo nde tokpa bakenane.

¹⁸ Kristo leme ku ne bati tokpa lolo deedimɔape ekpa foko a flee. Tito kĩ enye oti wĩ malo a, eku ne tokpa bakenane lolo ayekĩ yaakpã mi enamena Baguma sekẽ. Beko ye ne sukena kame, leme Baguma dzela ye edzi nkpã ne Hũhũ kame.

¹⁹ Ena ne Hũhũ a kame, ade enale Baguma foletsɔ ekpa hũhũ a kĩ ewaa kola a.

²⁰ Ade be nye bati a kĩ betátse Baguma ɔledo, tito kĩ Baguma na ɔwɔle bɔεε ekpa be malo a ne loko a kĩ Noa kame ye adakã kpale a. Ye kame bati sukuloo kĩ biwo be elẽ lena nkpã ne mui kayili a kame.

²¹ Mui kayili kĩ ketimo mui kawɔla amanie a kĩ finyaa bekoɔ bete mi nkpã. Nné tuduli kavɔle ne oti akũ fɔane, mbom fonye fubo kalo kĩ oti aakɔa ye ɔwɔle flee ekpa Baguma. Baguma mui kawɔla a lete mi nkpã fɔtsãmena Yesu Kristo kayidza kato kanokpa a akũ.

²² Kristo naa ode, ade edzi ne Baguma sɔmɔna, yanya Baguma ode fɔto banyane, mo ode otumifo mo kobẽ flee akũ a.

4

Kene Kĩ Bate Badone Nkpã Kadzi Kevemena.

¹ Ayekĩ Kristo mó lubo nde otidziwa aye a ni, mi malo miakɔa adzuni mɔape a mido mi akũ kobẽ, kitonekĩ odi nye odi kĩ emo lubo ne sukena kame ni, yafõ tokpa kakena.

² Foesũ kito finyaa kanaa ni, midzi mi nkpã fuwi nkaε ne tite akũ a ne Baguma kawε onukpẽ, nné ne otidziwa fowetsa kĩ fɔakɔ odo a onukpẽ.

³ Kɔkɔε a, mibula lɔkɔ kade, midzi nkpã mikakena fɔtsa ndε amamufɔ aye ne lɔkɔ pii kame. Nkpã a kĩ midzi tɔ a nye kɔkɔbato kpa kabɔa, sukena fowetsa kpa liti katomena, bave kawuga, anya kpa kanya, futo kpa kato, mɔ baviɔ kasum kĩ fɔlãa mbla adima kayɔ.

⁴ Finyaa fɔakena amamufɔ a wãwã kĩ mibuki miãdo akũ ne be nkpã pupulidza kadzi kame, ne foesũ bale mi akũ tuwuli kpa.

⁵ Leme baanye be akũ onukpẽ bekpã Baguma a kĩ emane akũ kĩ yaadzemo bati a kĩ bidzi nkpã mɔ banɔkpa flee a.

⁶ Ade foesũ Kristo de letsã ne Kale Wĩ a akũ ekpa banɔkpa a leme a. Ade tito kĩ Baguma adzemo be ndε kefeta odi nye odi malo ni, Kristo de letsã ekpa be ayekĩ ne hũhũ kame ni, baadzi nkpã ndε Baguma aye.

Kene Kĩ Bɔkena Baguma Futetsa Akũ Adzuma, Bɔkɔa Busum Akũ Akũ.

⁷ Fɔtsa flee kawũna lɔkɔ fuã, foesũ mipi mi akũ kapi wĩ, mina ne kukũmane kame, ayekĩ miãpuli mibɔa mpaε.

⁸ Letsa titiliwu nye kĩ, miwe akũ kale mɔ ɔdo kĩ eto mi tɔwɔle kame flee, kitonekĩ ɔdo afɔ bati akɔa bati bebã tɔkpa pii kate.

⁹ Nte mi kame odi nase ɔwaε ni, εte ye mɔ kawɔle hũhũhũhũ kakena fɔtana ne foe kame.

¹⁰ Mi kame odi nye odi te futetsa pɔtii etomena Baguma sekẽ. Foesũ ndε Baguma futetsa futefute

kĩ akũ badāmenanɛ ni, mikena foe akũ adzuma kakena wĩ, ayekĩ fóana libi fókpa mi akũ akũ.

¹¹ Nte odi aɛ Baguma foletsa ni, ɛɛ foe ndɛ Baguma foletsa aye. Nte odi asum ni, ɛkɔa kɔbɛ a kĩ Baguma kpa ye a esum, ayekĩ nɛ letsa nyɛ letsa kame ni, bati aatsã Yesu Kristo akũ bimu Baguma. Ye fude nyɛ kukũkpale mo kɔbɛ daa daa. Fɔya lomo.

Lubokamo Nde Okristoni Aye.

¹² Yĩ bawenɛ, mitafɔ ayekĩ belamo mi kaso kadã, milamo lubo kamo mo kalɔɛ lekɛna mi wãwã ndɛ letsa vɔɛ kĩ miádã anɛ kolaa.

¹³ Mbom mifɔ kawɔɛ kide mi kĩ miamo lubo ndɛ Kristo aye, ayekĩ nte ené ɛta nɛ ye kukũkpale a kame ni, mi malo míapuli mimó kawɔɛ mitu osee.

¹⁴ Nte bati vũna mi kĩ mi nɛ ayekĩ mitomo Kristo sũ ni, kawɔɛ kide mi, kitonekĩ kukũkpale Hũhũ a, kĩ enyɛ Baguma Hũhũ a tomo mi.

¹⁵ Nte mi kame odi amo lubo ni, fotanya kĩ enyɛ owudini, ãye oyekpanɛ, ãye fotsa kpa okɛnanɛ ãye kĩ edo onukpɛ nɛ bati bebã foletsa kĩ fotséla ye akũ a kame.

¹⁶ Lemɛ nte mi kame odi amo lubo kĩ enyɛ Kristo ode sũ ni, konyɔã kotako ye, mbom emu Baguma kĩ Kristo dĩ teĩ nɛ ye akũ.

¹⁷ Loko wo oto kĩ Baguma aayi bati kadmɛna kayo, ade ye moawɛ toto kame yaanya loto ɛdzemɛna a. Ade nte eyi kayo nɛ boe akũ a, ndɛ fóawũna fókpa bati a kĩ betáte ye Kale Wĩ a bido a?

¹⁸ Nde ayekĩ Katsɛɛ Kpalɛwa a lɛ a,

“Nte fudeĩ ɔsĩ fomo Baguma aate bati kpĩ bena
nkpã ni,
kekõ nde fóna fɔkpa bati a kĩ baávila
Baguma mo tɔkpa bakenane a?”

¹⁹ Foesũ bati a kĩ bamo lubo nde ayekĩ Baguma
we ekpa be a bekena tuwĩ, bekoa be okla flee
bido ne be Ɔboane a kĩ yaápãã ne ye kalékayi
akũ da a awe kame.

5

Midã Baguma Baveli Kɔdabu a Kadã Wĩ.

¹ Finyaa, yĩ nde asoli ɔnɔkɔẽ aye ni, mawe kĩ
made asafu banɔkɔẽ a kĩ bideĩ ne mi kame a. Yĩ
mɔawe a mmó ayekĩ Kristo mó lubo, ade maana
tsefã ne ye kukũkpale a kĩ baanye betsa a kame
a. Makpa mi kɔde kĩ,

² Mikpã Baguma baveli kɔdabu a kĩ ekɔa edo
ne mi awe a kadã wĩ. Midã be akũ nde ayekĩ
Baguma awe ne ɔdo kame, kĩ nné ne ɔhe kame.
Mitakena adzuma ne kɔtɔkase sũ, mbom mifõ
futo mi ɔwɔle faa kame.

³ Mitawe kĩ mianya bati a kĩ Baguma kɔa edo
mi ne awe a akũ, mbom mi ɔbla enya nfantuhũ
ekpa baveli kɔdabu a.

⁴ Nte Baveli Ɖdãmenane ɔnɔkɔẽ a ne eta ni,
miana kukũkpale legãboe a kĩ de ɔhaĩ a lelãabu
kade.

⁵ Ade ayea mi bapopo lemɛ midɔla mi akũ
mikpa mi banɔkɔẽ a. Mi a flee midɔla akũ mikpa
mi akũ, misum akũ ne mi lekenana lidi nye lidi
kame. Kitonekĩ Katsɛle Kpalewa a le kĩ,
“Baguma ayidza kadza ne bati a
kĩ badɛla be akũ ne ode a akũ,

leme yamɔ bikĩ bedɔla be akũ a kɔnya.”

⁶ Ne foesũ midɔla akũ mido ne Baguma kɔbẽ awe a kayɔ, ayekĩ yaadela mi ne ode ne ye mɔawe lɔkɔ wĩ a kame.

⁷ Mikɔa fɔtsa a kĩ fɔaha mi a flee mido ne Baguma awe kame, kitonekĩ ye adãmena mi akũ.

⁸ Mina ne kukũmanɛ kame, mikaadã kadã wĩ! Mi okesĩne, Abonsam, tsẽ yamini nde Dzata kĩ yakulumɛ, kĩ yawɛ odi epi eyele eba. ⁹ Mikɔa kadza pintii ne katekado kame misua tɔkpa osi, kitonekĩ minyina kĩ mi bakɔba Kristofɔ ne katinya kame flee lamena lubo kĩĩ odu kamɔ.

¹⁰ Leme ne mi lubo kamɔ lɔkɔ lukũ liti ni, Baguma a kĩ ye kɔnyakamɔ pɔne a, aakena mi mikpɔla, edo mi kɔbẽ midza pintii. Kitonekĩ eve mi kĩ miyaana tsefã ne ye daa kukũkpale a kame, ne ɔmɔa kakena mɔ Kristo sũ.

¹¹ Ade ye deĩ kɔbẽ daa daa a! Fɔya lɔmɔ.

Kawõna Nkaɛ.

¹² Ntsele fɔletsã lukũ kĩĩ ntsãmena Silvano akũ mama mi. Mabu ye nde ɔkɔba okristoni kĩ yadi ɔnɔkɔali. Mawe kĩ mado mi kɔbẽ mɔ letsã a kĩ yĩ mɔawe mmó kĩ ade Baguma kɔnyakamɔ a ne awĩ a. Midza pintii ne ye kame.

¹³ Babilonia asafu a, kĩ Baguma pau nde mi aye a, awõna mi. Ade aye yĩ obi Marko leme awõna mi a.

¹⁴ Miwõna akũ ne Kristo ɔdɔ kame.

Lukudɔ litomɔ mi flee a kĩ mikena ɔmɔa mɔ Kristo.

Tuwuli

Tuwuli: Baguma Apam Vɔɛ a Tuwuli New Testament

copyright © 2008 Wycliffe Bible Translators, Inc.

Language: Tuwuli

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 28 Apr 2025 from source files dated 29 Apr 2025

68df0193-2981-5275-8994-8f743fe01e5e